

PARLIMEN MALAYSIA
PEMBERITAHU PERTANYAAN DEWAN RAKYAT

PERTANYAAN : Bertulis

**DARIPADA : Datuk Hajah Norah Binti Abd Rahman
[Tanjong Manis]**

TARIKH : -

SOALAN : Datuk Hajah Norah Binti Abd Rahman [Tanjong Manis] minta MENTERI PERTANIAN DAN INDUSTRI ASAS TANI menyatakan hala tuju negara serta program dalam meningkatkan kualiti dan kuantiti makanan bagi menampung keperluan dalam negara, meningkatkan hasil eksport sekali gus mengurangkan kebergantungan import makanan dari luar.

JAWAPAN

Tuan Yang Dipertua,

Hala tuju negara serta program dalam meningkatkan kualiti dan kuantiti makanan ditetapkan melalui pelaksanaan Dasar Agromakanan Negara (DAN) 2011-2020. DAN telah dirangka bagi memastikan jaminan bekalan makanan negara meliputi komponen-komponen utama berikut:

- (i) ketersediaan (*availability*) bekalan makanan bagi memenuhi permintaan. Penawaran bekalan boleh dicapai sama ada melalui pengeluaran dalam negara, import dan simpanan stok;
- (ii) akses (*accessibility*) iaitu capaian fizikal terhadap bekalan makanan dan kemampuan untuk memperolehinya (*affordability*);
- (iii) keselamatan dan khasiat (*safety and nutrition*) di mana bekalan makanan perlu dipastikan selamat dan berkhasiat; dan
- (iv) kestabilan (*stability*) iaitu bekalan makanan boleh diperolehi pada setiap masa

Dalam hubungan ini, bagi mengukuhkan jaminan bekalan makanan negara, Kementerian Pertanian dan Industri Asas Tani (MOA) terus meningkatkan pengeluaran dalam negara bagi menampung bekalan dan meningkatkan Tahap Sara Diri (*Self Sufficiency Level – SSL*) melalui:

- (i) pelaksanaan Projek Berimpak Tinggi seperti Taman Kekal Pengeluaran Makanan (TKPM), Zon Industri Akuakultur (ZIA), Ladang Kontrak dan Pembangunan Usahawan Asas Tani;
- (ii) pembangunan 4 kawasan pembangunan pertanian bersepadu (IADA) iaitu Pekan dan Rompin di Pahang, Batang Lupar di Sarawak dan Kota Belud di Sabah sebagai jelapang padi negara yang baru;

- (iii) mengoptimumkan produktiviti pengeluaran hasil melalui penggunaan benih berhasil tinggi seperti benih padi MR220, CL2 dan MARDI 284, mekanisasi dan automasi; mengurangkan kerugian lepas tuai; serta peningkatan intensiti tanaman; dan
- (iv) menggalakkan penyertaan belia dan usahawan muda dalam bidang pertanian melalui Program Agroprenuer Muda.

Dalam masa yang sama, tumpuan diberikan supaya hasil pengeluaran dalam negara adalah berkualiti, selamat dan bernutrisi dengan memperluaskan Amalan Pertanian Baik seperti persijilan MYGap, akreditasi halal serta meningkatkan mutu pengredan, pembungkusan dan pelabelan.

Selain memenuhi permintaan melalui pengeluaran dalam negara, Malaysia juga mempunyai stok penimbal beras bagi memastikan bekalan beras yang mencukupi. Stok penimbal beras pada masa ini ditetapkan pada tahap 150,000 tan metrik bagi menampung keperluan maksimum selama 30 hari.

Bagi memenuhi permintaan dalam negara untuk bahan makanan yang tidak ekonomik untuk dihasilkan dalam negara seperti buah-buahan dan sayur-sayuran *temperate*, gandum, gula dan sediaan gula, kekurangan pengeluaran tempatan adalah ditampung melalui import.

Sungguhpun demikian, Kementerian terus melaksanakan strategi bagi memperbaiki imbalan dagangan makanan negara dan supaya tidak terlalu bergantung kepada import melalui:

- i) pelaksanaan projek agromakanan yang mempunyai potensi pertumbuhan tinggi dan potensi eksport yang baik di bawah program Bidang Ekonomi Utama Negara (NKEA) iaitu akuakultur, rumpai laut, sarang burung walit, herba, buah-buahan dan sayur-sayuran serta makanan proses premium;

- ii) pembangunan industri tenusu termasuk baka bagi mengurangkan import susu dan hasil tenusu; dan
- iii) pembangunan Industri Jagung Bijirin di kawasan-kawasan pertanian seperti di luar jelapang padi bagi menangani import makanan ternakan.

Pada tahun 2016, imbalan dagangan makanan negara adalah lebih baik di mana defisit telah berjaya dikurangkan kepada negatif RM16.6 bilion berbanding negatif RM18.1 bilion pada tahun 2015.

Untuk makluman, berdasarkan kajian Indeks Jaminan Bekalan Makanan Global tahun 2016 (*The Global Food Security Index – GFSI*) yang dijalankan oleh *The Economist Intelligence Unit*, Malaysia telah diletakkan di tangga ke-35 daripada 113 buah negara. Jika dibandingkan dengan negara-negara ASEAN lain dalam senarai GFSI, kedudukan Malaysia adalah di tangga ke-35, iaitu di bawah Singapura yang berada pada kedudukan ke-3, tetapi mendahului kedudukan negara Thailand (ke-51), Vietnam (ke-57), Indonesia (ke-71), Filipina (ke-74), Myanmar (ke-80), Cambodia (ke-89) dan Laos (ke - 103).